

摘藻堂四庫全書薈要

集部

欽定四庫全書薈要卷二萬三百二十九

集部

宋詩鈔卷七十六

內閣中書舍人吳之振編

楊萬里江西道院集鈔

戊申四月九日得請補外初出國門宿釋迦寺

出却金宮入梵宮翠微綠霧染衣濃三年不識西湖月  
一夜初聞南澗鐘藏室蓬山真昨戲園翁溪友得今從  
若非朝士相追送何處冥鴻更有蹤

明發南屏

新晴在在野花香過雨迢迢沙路長兩度立朝今結局  
一生行客老還鄉猶嫌數騎傳書札剝喜千山入肺腸  
到得前頭上船處莫將白髮照滄浪

過南蕩

秧纔束髮幼相依麥已掀髯喜可知笑殺槿籬能耐事  
東扶西倒野酴醾

近岫遙峰翠作圍平田小港碧行遲垂楊一徑深深去

阿那人家住得奇

過楊村

石橋兩畔好人烟  
匹似諸村別一川  
楊柳陰中新酒店  
葡萄架底小漁船  
紅紅白白花臨水  
碧碧黃黃麥際天  
政爾清和還在道  
為誰辛苦不歸田

側溪解纜

夢裏喧聲定不凡  
順風解纜破晴嵐  
起來職事惟洗面  
此外功名是挂帆  
莫笑一蔬兼半菽  
飽食萬壑與千巖

蓬萊雲氣君休望且向嚴灘濯布衫

舟過桐廬

瀟灑桐廬縣寒江繚一灣朱樓隔綠柳白塔映青山稚  
子排牕出舟人買菜還峰頭好亭子不得一躋攀

近縣人人喜來船岸岸移偶因小泊處恰是早餐時喚  
僕答相亂看山寒不知橫洲猶半在今歲水生遲  
後面山無數南頭柳更多人家逼江岸屋柱入滄波老  
去頻經此重來更幾何牛山動悲感曾侍板輿過

溜港灘

此去嚴州只半程一江分作兩江橫  
忽驚洲背青山下却有桅檣地上行

蘭溪女兒浦曉寒

前年寒早熟亦早去年寒遲熟亦遲  
何曾寒暑有遲速通融三年那兌支  
人生何必早得意芍藥榮時牡丹瘁  
榮枯遲速一笑休順風今日好行舟

嘲穉子

雨裏船中不自由無愁穉子亦成愁看渠坐睡何曾醒  
及至教眠却掉頭

柴步灘

江濶水不聚分為三五灘遂令客子舟上灘一一難小  
沙已成洲大沙已成山山有樹百尺樹圍屋數間水底  
復生洲沙濕猶未乾從此洲愈多安得水更寬憶從嚴  
陵歸水落不能湍拖以數童僕折却十竹竿今茲過吾  
舟念昔猶膽寒

東磧灘

江船初上灘灘水政勃怒船工與水鬪水力攔船住琉璃忽破碎冰雪併吞吐竟令水柔伏低頭船底去朝來發盈川已過灘十許但聞浪喧闐未覩水態度却緣看後船偶爾見奇處從此至三衢猶有灘四五

將至地黃灘

未到地黃灘十里先聞聲橈竿已震掉未敢與渠爭舟人各整篙有如大敵臨塞蓬試一望濺雪紛淙琤乃是

水磴港為灘作先鳴真灘定若何老夫虛作驚

蘇木灘

灘雪清濺眸灘雷怒醒耳落洪翠壁立跳波碧山起船  
進若戰勝船退亦遊戲若非篙師苦進退皆可喜忽逢  
下灘舟掀舞快雲駛何曾費一棹纔瞬已數里會有上  
灘時得意君勿恃

遼車灘

東岸上不得西岸上更難五船往復來經緯灘兩間一

船初徑進當流為衆先  
濤頭打澎湃退縮不敢干  
一船作後殿忽焉突而前  
瞬息越湍險回顧有矜顏  
老夫與寓目亦為一粲然

### 過查灘

眼底常山一武中  
上灘更得半帆風  
青天以水為銅鏡  
白鷺前身是釣翁  
舊日岸頭渾改盡  
數尖山嘴忽攬空  
老夫只費五六日  
行盡浙山西復東

### 過鉛山江口

下却諸灘水漸平舟行已遠上饒城酒家便有江鄉景  
綠柳梢頭挂玉瓶

初二日苦熱

人言長江無六月我言六月無長江只今五月已如許  
六月更來何可當船艙周圍各五尺且道此中底寬窄  
上下東西與南北一面是水五面日日光煮水復成湯  
此外何處能清涼掀篷更無風半點揮扇只有汗如漿  
吾曹避暑自無處飛蠅投吾求避暑吾不解飛且此住

飛蠅解飛不飛去

感秋

昨扇猶午攜今裳覺晨單起來且復卧未敢窺柴闌不  
覺病至此為復老使然平生性剛燥畏熱長喜寒念昔  
忝鄉賦踐雪詣春官布褐皆不續芒鞋繭且穿長亭夜  
濯足吹燈呻故編買酒破孤悶浩歌毀屋椽何曾悲凜  
秋山稜聳臞肩秋風吹我髓秋露滴我肝我欲與秋敵  
秋先令我酸歎息復歎息誰是長少年

盥漱已云畢危坐正冠衣覽鏡忽見我不識我為誰自  
倚身尚強不悟年已衰舉頭視嘉木向人慘無姿我欲  
訴渠老渠乃懷秋悲木悲不解飲瑟瑟聲怨咨我且呼  
麴生細細斟酌之我醉不知我更知春秋為

墮照趣夕黯孤燈啓宵明老夫倦欲睡似醉復如醒寸  
心無寸恨但如江海清秋蛩何為者四面作怨聲淒惻  
竟未已抑揚殊不平切切百千語遞遞三四更繞砌尋  
不得靜坐復爭鳴有口汝自苦我醉不汝聽

秋曉寒可忍秋夕永難度青燈照書冊兩眼如隔霧  
卷却孤坐塊然與誰語倒卧卧不得起行行無處屋角  
忽生明山月到庭戶似憐幽獨人深夜約清晤我吟月  
解聽月轉我亦步何必更讀書且與月聯句

平生畏長夏一念願清秋如何遇秋至不喜却成愁書  
冊秋可讀詩句秋可搜永夜宜痛飲曠野宜遠遊江南  
萬山川一夕八寸眸請辦雙行纏何處無一丘

明發五峰寺

歸時路何近去時路何遠山路無短長人心有往返每  
因赴官期一出謁鄉縣若非人事牽無奈老身懶初心  
作此行夜雨醒醉眼孤愁念羣騶尺泥滑雙趺首塗天  
全濕回轍雲半捲投寺借松牀呼僧同野飯頽然挂眠  
足得此行役倦暫勞新不堪遐征舊所歎松菊豈不懷  
樊籠何時免瘦藤要覓閒到了古道院

初入筠州界高岡鋪

千尺霜松夾道周國初涼織至今留筠州舊是朝天路

六十年來行信州

路人號夾道  
松為涼繖樹

和尤延之見戲觸藩之韻以寄

儂愛山行君水遊尊前風味獨宜秋  
文戈却日玉無價

器寶羅罍金欲流  
欬唾清圓談者詘  
詩章精悍古人羞

子房莫笑身三尺  
會看功成自擇留

延之戲誠齋為羊  
誠齋戲延之為蚍

蝘詩所云云  
謂蚍蚥也

讀退之李花詩

桃李歲歲同時並開而退之有花不見桃  
惟見李之

句殊不可解因晚登碧落堂望隔江桃皆暗而李獨明乃悟其妙蓋炫晝編夜云

近紅暮看失燕脂遠白宵明雪色奇花不見桃惟見李  
一生不曉退之詩

郡圃晚步因登披仙閣

昨來風日較暄些破曉來遊特地佳也自低頭花下過  
依前撞落一頭花

李花半落雪成堆末後桃花陸續開白錦地衣紅錦帳

侵晨供張等儂來

初夏玉井亭晚立

冶蕊嬌花一雨空  
鮮晴新漲未虧儂  
竹兼樹影眠天底  
人凭欄干立鏡中  
看盡水衣投北岸  
方知今日是南風  
黃鸝對語無尋處  
忽見雙飛入別叢

筠庵

故老談李仙  
昔日上寥廓  
隨身無長物  
止跨一隻鶴  
鶴本非胎生  
古卵尚遺壳  
千年石似堅  
覆在鳳山脚  
寒宵

晦風雨神光照岩壑犬吠鷄鳴龍泣人寢愕祗今筠  
菴是因物非繩削當時拖破處作門不關鑰蓋以一把  
茅聊以護霜電遐瞻如釣翁簑衣逐層着我來驗幽討  
尚疑俗諺謔霧中披羽衣砌下脫芒屨入戶環仰觀中  
空生響諾不見朱頂雛猶存雪色膜松梢雙老鶴憂然  
下簷角老夫忽心驚不敢小盤礴

新暑追涼

去歲衝炎橫大江今年度暑卧筠陽滿園無數好亭子

一夏不知何許涼  
待得老夫親勘當  
更招幽鳥細商量  
朝慵午倦誰相伴  
猫枕桃笙苦竹牀

碧落堂暮景轆轤體

碧落堂中夕眺餘  
一聲哀角裂晴虛  
滿城煙靄忽然合  
隔水人家恰似無  
坐看荷山沉半脊  
急歸道院了殘書  
意行花底尋燈處  
失脚偏嗔小吏扶

雨過郡圃行散

劍池一日百週遭  
雨後閒來照鬢毛  
主管園林鶯稱意

巡行荷芰驚宣勞不須見我還飛去便與移文告汝曹  
一事惱人無問處南山高是北山高

碧落堂曉望荷山

荷山非不高城裏自不見一登碧落堂山色正對面如  
人卧平地躍起立天半指揮出伏兵萬騎橫隔岸後乘  
來未已前驅瞻已遠晨光到岩壑人物俱清絢綠屏紛  
開閣翠旗閃舒卷安得垂天虹橋虛度雲巘老鈴偶報  
事郡庭集賓贊

贊政化  
行也

忽忽換山中默默下林坂

午憇筠菴

筠菴偶坐處適當樹闕間遠山不見我而我見遠山清  
風隔江來宛轉入松關翠蕉自搖扇白羽得暫閒可憐  
三竹牀睡徧復循環秋暑自秋暑山寒自山寒小噓聊  
適意好惡不必刪

答陸務觀道院佛祖之戲

老禪分得破鼓林薄供微齋也不曾道院勑差權院事  
筠菴身是住菴僧人間赤日方如火松下清風獨似冰

別有莫春沂水在為君一滴洒千燈

延之寄詩覓道院集遣騎送呈和韻謝之

與君髣髴總星星詩句輸君老更成別去多時頻夢見  
夜來一雨又秋生故人金石情猶在贈我瓊琚雪似清  
誰把尤楊語同日不教李杜獨齊名

祇召還京題江西道院

病身祇要早投閒乞得高安政小安山水秋來渾是畫  
樓臺高處自生寒登臨未足還辭去老大重來畢竟難

碧落翠微好將息清風明月夢中看

郡圃鳳山佳處有碧落堂翠微臺

問途有日戲題郡圃

今朝郡圃放遊人懊惱遊人作撻春到得老夫來散策  
亂吹花片總成塵商量歲後牢關鎖拘管風光屬病身  
造物嗔儂先遣去遣儂儂去不須嗔

留題筠菴以菴室用茅蓋層出如蓑衣然

茂林脩竹翠光中那得披蓑一老翁白石砌成珠子徑  
黃茅裹却水晶宮夏涼冬暖非人境雪打霜封即釣篷

老子明朝便東去更攜瓦枕享松風

明發道經生米市隨喜西林寺留題進退格

貪睡能無起挑燈強未殘春聲忙野店月色淡柴門又  
踏黃塵路前追紅葉村秋衣那敢薄病骨自難溫

羲娥謠

中秋夜宿辟邪市詰朝早起曉星已上日欲出而月  
未落光景萬變蓋天下奇觀也作羲娥謠以記之

羲和夢破欲起行紫金畢逋啼一聲聲從天上落人世

千村萬落鷄爭鳴素娥西征未歸去簌弄銀盤浣風露  
一丸玉彈東飛來打落桂枝雪毛兔誰將紅錦幕半天  
赤光絳氣貫山川須臾却駕丹砂轂推上寒空輾蒼玉  
一本此下有雲漢  
昭回光滿天句誤詩翁已行十里強羲和早起道無雙

小憇上坊鎮新店進退格

下轎行新店排門得小軒中間一棊几相對兩蒲團  
椽竹青留節簷茅白帶根明窓有遺恨接處紙痕斑

題十里塘夜景

物色當秋半登臨更夜闌山光倒眠水水影上搖山宿  
鷺都飛去漁人獨未還老夫與明月分割一清灣

過土簔岡

木落初宜菜亭荒不復茅牛分叉路口鶴立禿松梢秋  
熱方昇日朝涼更迥郊衰年走塵鞅何計返雲巢

入玉山七里頭

諸村不雨數旬餘此地瀕江萬寶蘇晚紫豆花初總角  
早黃稻穗已長須回頭金步野蹊遠當面玉山秋塢孤

偶見年時解船處客愁依舊挂菰蒲

筠洪小路至餘千金步市初出官給

路

### 宿查瀨

寒流一帶檻前橫落日諸峰霞外明  
水斷新洲添五里客尋舊路却重行  
江車自轉非人踏沙碓長春徹夜鳴  
疇昔穉桑今禿樹如何白髮不教生

### 晨炊泊楊村

沙步未多遠里名還異原對江穿野  
店各路入深村秋

水乘新汲春芽煮不渾舟中爭上岸竹裏有清樽

九月一日夜宿盈川市

下灘一日抵三程到得盈川也發更兩岸漁樵稍燈火  
滿江風露更波聲病身只合山間老半世長懷客裏情  
西畔天星如玉李伴人不睡向人明

下橫山灘望金華山

篙師只管信船流不作前灘水石謀却被驚湍旋三轉  
倒將船尾作船頭

山思江情不負伊  
雨姿晴態摠成奇  
閉門覓句非詩法  
只是征行自有詩

出橫山江口

白壁當江岸  
青旗定酒家  
斷崖侵屋窄  
細路入門斜  
縣近瞻雙塔  
洲橫隔一沙  
何須後來客  
始信此詩嘉

過橫山塢下

隔岸山迎我  
沿江柳拜人  
日搖秋水面  
波閃白龍鱗  
不遣船迷路  
俱從塢問津  
一生將玉鏡  
千古照金身

過烏石大小二浪灘俗呼為郎因戲作竹枝歌二

首

灘聲十里響千聲躍雪跳霜入眼奇記得年時上灘苦  
如今也有下灘時

小郎灘下大郎灘伯仲分司水府關誰為行媒教作贅  
小姑山與大姑山

晚過側溪山下

看山妙處幾曾知落照斜明始覺奇皺盡衣裳紋欲裂

爭先頭角遠相追  
松梢別放六峰出  
江底倒將千嶂垂  
一路詩篇渾漫興  
側溪端的不相虧

夜宿東渚放歌

看山須看山表裏  
不然看山還誤事  
平時只愛萬峰青  
落日惟存數尖紫  
浙江船上多少人  
往來看山誰識真  
丁寧舟人莫浪語  
却恐兒輩不肖去

跋徐公仲省翰近詩

傳派傳宗我替羞  
作家各自一風流  
黃陳籬下休安脚

陶謝行前更出頭

自跋江西道院集戲答客問

問我來朝南內南便從花底趨朝叅新詩猶作江西集

為帶筠州刺史銜

時召命筠州守臣奏事

舟中新暑止酒

新暑酒不宜作熱妨夜睡不如看人飲亦自有醉意彼  
飲吾為嚙所美過於味同舟笑吾癡吾不羨渠醉安知

醉與醒誰似誰不似

一作是

過弋陽觀競渡

急鼓繁鉦動地呼  
碧琉璃上兩龍趨  
一聲翻倒馮夷國  
千載淒涼楚大夫  
銀碗錦標夸勝捷  
畫橈繡臂照江湖  
三年端午真虛過  
竒觀初逢慰道塗

五月一日過貴溪舟中苦熱

半月陰涼天氣佳  
今朝新暑不饒些  
一生怕熱長逢熱  
千里還家未到家  
入却船來那得出  
恰方日午幾時斜  
勸君莫愛高官職  
行路難時却怨嗟

端午前一日阻風鄱陽湖觀競渡

惡風夜半阻歸船，端欲留人作勝緣。  
千里攜家觀競渡，五湖新漲政黏天。  
掉翻波浪山如雪，醉殺兒郎喜欲顛。  
得去更佳留亦好，吾曹何處不忻然。

送吉州太守朱子淵造朝

公在鄉邦我在京，有書終不慰生平。  
西歸一見還傾蓋，夜坐相看話短檠。  
老去可堪頻送客，古來作惡是離情。  
雲涯隔斷從今始，肯倩征鴻訪死生。

郡圃上巳

尋春不見只思還却在蓬萊小崦間  
映出一川桃李好只消外面矮青山

披仙閣上觀酴醾

仰架遙看時見些登樓下瞰脫然佳  
酴醾蝴蝶渾無辨飛去方知不是花

酴醾約我早來看及至來看花已殘  
動地寒風君莫怯亂吹香雪灑闌干

塹荷池水

雨中來看塹池塘自與畦丁細校量更放水痕高幾許  
浮荷猶剩若干長

筠菴午憩

筠菴稍不至一至一回好風從林梢落吹亂竹根草巾  
屨上下涼鶯鵲左右噪市聲元不近靜聽遠亦到石磴  
坐來溫蘚徑淨如埽書空作愁字已忘偏旁了猶自忘  
了愁而況記得老客來談世事欲笑還嬾笑

玉井亭觀荷

萼仙初出波照日穉猶怯密排碧羅蓋低護紅玉頰  
館之水精宮環以琉璃堞珠明浮盤戲酒漾流杯曄青筆  
尖欲試綠牋皺還摺老龜大於錢辛勤上團葉忽聞人  
履聲入水一何捷

後圃散策

花徑雨後涼樹聲風外戰杖屨頓輕鬆兒女同行散少  
者前已失老者後仍倦隔林吹笑語相聞如對面明明

去人近眇眇彌步遠松杉滿地影一瞬忽不見仰觀紫  
日輪偶度白雲片佳處留再來前山未須徧

觀迎神小兒社

花帽銖來重綃裳水樣秋强行終較嬾妍唱却成羞鸚  
鵡栖葱指笑渠載錦舟休看小兒社只益老人愁

新秋晚酌

胡床東鄉坐秋風忽淒其老夫衰病骨急令閉東扉西  
扉已半掩壓風作東吹何必風及我風入涼自馳晚蟬

是誰說我飲渠便知飛從何方來徑集庭樹枝三嘆復  
九詠話盡新秋悲我老悲已忘汝語復為誰老烏啼一  
聲不知蟬所之

題碧落堂

仙人白日上青冥千載如聞月下笙南北萬山俱在下  
中間一水獨穿城江西箇是絕奇處天下幾多虛得名  
滕閣孤臺非不好祇緣猶帶市朝聲

羅溪望夫嶺

小憇村店問嶺名云望夫七娘歲旱禱雨必應

藁砧不寄大刀頭化作峰頭石也愁豈有心情管風雨  
向人彈淚繞天流

羅溪道中

每歲秋猶熱今年閏故涼松稀青有數山遠碧無常陣  
陣金風細家家玉粒香祇言官路短堠子暗添長

秋山

烏臼平生老染工錯將鐵卓作猩紅小楓一夜偷天酒

却倩孤松揜醉容

觀水歎二首

我方卧舟中仰讀淵明詩忽聞灘聲急起視惟恐遲八月濺飛雪清覽良獨奇好風從天來翛然吹我衣涼生固足樂氣變亦可悲眷然慨此水念我年少時迄今四十年往來幾東西此日順流下何日汭流歸出處未可必一笑姑置之

亂石厄江水要使水無路不知石愈密激得水彌怒回

鋒打別港勇往遮不住我舟歷諸灘閱盡水態度一聞  
一喜觀屢過屢驚顧不是見不多觀覽不足故舟人笑  
我癡癡點未易語

舟過柴步寺

野寺隔疎樾遠舟見深殿獨逕通絕崖長縈度微線曩  
遊攜童弱攀岸已震眩前瞻足未到下窺意先轉朝來  
經雲根塵思起清羨野夫三二輩走過疾于箭俛仰二  
十年今老懷昔健

宿蘭溪水驛前三首

繫纜蘭溪岸開襟柳驛窗人爭趨夜市月自落秋江燈  
火疎還密帆檣隻更雙平生經此縣今夕駐孤幢


合眼波吹枕開篷月入船奇哉一江水寫此二更天剩  
欲酣清賞翻愁敗醉眠今宵懷昨夕雨卧萬峰前  
水色秋逾白山光夜不青一眉畫天月萬粟種江星小  
酌居然醉當風不覺醒誰家教兒子清誦隔疎櫺

過白沙竹枝歌

東汭西泝浙江津去去來來暮復晨上  
岸牽檣推穉子  
隔船招手認鄉人



宋詩鈔卷七十六



總校官庶吉士臣張能照  
校對官檢討臣王鍾健  
謄錄貢生臣蘇曰柄

欽定四庫全書薈要

集部

宋詩鈔卷七十八

詳校官候選知縣臣吳甸華



欽定四庫全書薈要卷二萬三百三十

集部

宋詩鈔卷七十七

內閣中書舍人吳之振編

 楊萬里朝天續集鈔

和陸務觀見賀歸館之韻

君詩如精金入手知價重鑄作鼎及鼎所向一一中我  
如鴛並驥夷塗不應共難追紫蛇電徒掣青絲輟折膠  
偶投漆異榻豈同夢不知清廟茅可望明堂棟平生憐

坡老高眼薄蕭統渠若有猗那心  
有師晉宋破琴聊再行新笛正三弄  
因君發狂言湖山春已動

讀笠澤叢書

笠澤詩名千載香一回一讀斷人腸  
晚唐異味同誰賞近日詩人輕晚唐

松江縣尹送圖經中有唐詩喜不勝  
看到燈青仍火冷雙眸如割脚如冰

拈着唐詩廢晚餐  
傍人笑我病如癲  
世間尤物言西子

西子何曾直一錢

五更過無錫縣寄懷范叅政尤侍郎

蘇州欲見石湖老到得蘇州發更早錫山欲見尤梁溪  
過却錫山元不知起來靈巖在何許回首惠山亦何處  
人生萬事不可期快然却向常州去

晚風

晚日暄溫稍霽威晚風豪橫大相欺做寒做冷何須怒  
明早一霜誰不知

晚風不許鑑清漪却許重簾倒地垂  
平野無山遮落日西窗紅到月來時

題連滄觀呈太守張幾仲

開窓納盡大江秋天半飛樓不是樓  
獨立南徐鼇絕頂下臨北固虎回頭  
蒜山舊址空黃鶴瓜步新城照白鷗  
好事主人酌詩客風煙一眼到揚州

丹陽舍舟登陸渡江

小泊樓船鐵甕城匆匆又作絕江行  
看他蠟燭幾回剪

聽盡鷄聲不肖明水底霜寒還十倍夜來月上恰三更  
篙師好語君知否江面侵晨鏡樣平

舟過楊子橋遠望

此日淮堧號北邊舊時南服紀淮堧平蕪盡處渾無壁  
遠樹梢頭便是天今古戰場誰勝負華夷險要豈山川  
六朝未可輕嘲謗王謝諸賢不偶然

過高郵

解纜維揚欲夕陽過船覆盎已晨光夾河漁屋都編荻

背日船蓬尚滿霜城外城中四通水隄南隄北萬垂楊  
一州斗大君休笑國士秦郎此故鄉

初食淮白魚

淮白須將淮水煮江南水煮正相違霜吹柳葉都落盡  
魚喫雪花方解肥醉卧糟丘名不惡下來鹽豉味全非

饗人且莫供羊酪更買銀刀二尺圍

淮人云白魚食雪乃肥

初入淮河四絕句

船離洪澤岸頭沙人到淮河意不佳何必桑乾方是遠

中流以北即天涯

劉岳張韓宣國威趙張二將築皇基長淮咫尺分南北  
淚濕秋風欲怨誰

兩岸舟船各背馳波痕交涉亦難為只餘鷗鷺無拘管  
北去南來自在飛

中原父老莫空談逢着王人訴不堪却是歸鴻不能語  
一年一渡到江南

題盱眙軍東南第一山

建隆家業大于天慶歷春風一萬年廊廟謀謨出童蔡  
笑談京洛博幽燕白溝舊在鴻溝外易水今移淮水前  
川后年來世情了一波分護兩涯船

初食太原生蒲萄時十二月二日

淮南蒲萄八月酸只可生喫不可乾淮北蒲萄十月熟  
縱可作羶也無肉老夫臘裏來都梁釘坐那得馬乳香  
分明猶帶龍鬚在徑寸玄珠肥十倍太原清霜熬絳錫  
甘露凍作紫水精隆冬壓架無人摘雪打冰封不曾拆

風吹日炙不曾腊玉盤一朶直萬錢與渠傾蓋真忘年  
君不見道逢麴車口流涎

與長孺共讀東坡詩前用唐律後用進退格

急性平生不少徐讀書不喜喜觀書十行俱下未心醒  
兩目頓昏還月餘偶與兒曹繙故紙共看詩句煮春蔬  
問來却是東坡集久別相逢味勝初

枉着平生多少書分明便是蠹書魚萬籤過眼還休去  
一字經心恰似無急讀何如徐讀妙共看更勝獨看渠

麴生冷笑仍相勸  
惜取殘零覓句鬚

嘲淮風進退格

絮帽貂裘莫出船  
北窗最緊且深關  
顛風無賴知何故  
做雪不成空自寒  
不去掃清天北霧  
只來捲起浪頭山  
便能吹倒僧伽塔  
未直先生一笑看

雨作抵暮復晴

細雨如塵復似烟  
兩淮渡口各收船  
南商北賈俱星散  
古廟無人燒紙錢

前苦寒歌

四大海潮打清淮三萬里風平地來龜山橫身攔不住  
潮波怒飛風倒回欲晴不晴雪不雪併作苦寒凍人絕  
古寺大鐘十字裂東山石崖一峰蹙勸君莫出君須出  
冰脫君髯折君骨

後苦寒歌

白鷗立雪脰透冷鷗鷁避風飛不正一雙野鴨欺晚寒  
出沒冰河底心性絕憐紅船黃帽郎綠簑青蒻牽牙樯

生愁墮指脫兩耳蘆花亦無何許藏遣騎前頭買乾荻  
速烘焰火與一炙三足老鴉不肖出看雲訴天天不泣  
雪小霽順風過謝陽湖

都梁三日雪沒屋小船行水如行陸山陽一朝帆遇風  
大船行水如行空昨來牽夫凍得泣買蘆燎衣蘆自濕  
朝來牽夫皆上船收纜脫巾篷底眠樓船忽然生兩翼  
橫飛直過陽侯國千村一抹片子時四岸人家眼中失  
似聞咫尺是揚州更數寶應兼高郵青天萬里當徑度

不堪回首都梁路

竹枝歌

有序

晚發丹陽館五更至丹陽縣舟人與牽夫終夕有聲  
蓋吟謳嘯詭以相其勞者其辭亦略可辨有云張哥  
哥李哥哥大家着力一齊拖又云一休休二休休月  
子彎彎照幾州其聲淒婉一唱衆和因櫟括之為竹  
枝歌云

吳儂一隊好兒郎只要船行不要忙着力大家齊一拽

前頭管取到丹陽

莫笑樓船不解行  
識儂號令聽儂聲  
一人唱了千人和  
又得蹉前五里程

船頭更鼓恰三槌  
底事荒鷄早箇啼  
戲學當年度關客  
且圖一笑過前溪

岸旁燎火莫闌殘  
須念兒郎手脚寒  
更把綠荷包熟飯  
前頭不怕上高灘

月子彎彎照幾州  
幾家歡樂幾家愁  
愁殺人來關月事

得休休處且休休

幸自通宵暖更晴何勞細雨送殘更  
知儂笠漏芒鞋破  
須遣拖泥帶水行

垂虹亭看打魚斫鱠

橋柱疎疎四寂然亭前突出小魚船  
一聲磔磔鳴榔起  
驚出銀刀躍玉泉

六隻輕舸攪四旁兩船不動水中央  
網絲一撒還空舉  
笑得倚欄人斷腸

過太湖石塘二首

每過松江得偉觀  
玻璃盆底釘乾坤  
天邊島嶼空無際  
烟外人家澹有痕  
笠澤古今多浪士  
包山近遠在何村  
季鷹爲魯望何曾  
死雪是衣裳月是魂

兀坐船中只欲眠  
不如船外看山川  
松江是物皆詩料  
蘭槳穿湖即水仙  
將取垂虹亭上景  
都歸却月觀中篇  
正緣王事游方外  
鑿齒彌天未當賢

過八尺遇雨

垂虹登了劣歸船又復毛空暗水天節裏無多好天色

闌風長

去聲

雨餞殘年

去年今日鳳山頭兒女團樂爭勸酬不及松江烟雨裏  
獨搔華髮一扁舟

過平望

豈但湖天好諸村揔可人麥苗染不就茅屋畫來真行  
止隨緣着江山到處新十年三過此贏得髻如銀

行得三吳徧清濟最是蘇樹園平野合水隔別村孤震

澤非塵世松陵是畫圖更添一詩老載雪過重湖  
小麥田田種垂楊岸岸栽風從平望住雨徬下塘來亂  
港交穿市高橋過得桅誰言破書筴擔取太湖回

秀州嘉興館拜賜春幡勝

中使傳宣下紫宸鏃頭濃染御香雲綵幡耐夏宜春字  
寶勝連環曲水紋癡似土牛鞭不動老登金馬媿無聞  
強簪華髮知難稱只有新詩頌萬分

幡勝用鏃  
頭紙貼

大兒長孺赴零陵簿示以雜言

長孺舊  
名仁壽

好官易得忙不得好人難做須着力汝要作好官令公  
書考不可鑽借令巧鑽得遺臭千載心為寒汝要作好  
人東家也是橫目民選官無選處却與天地長青春老  
夫今年六十四大兒壯歲初筮仕先人門戶冷如水豈  
不願汝取高位高位莫愛渠愛了高位失丈夫老夫老  
則老官職不要討白頭官裏捉出來生愁無面見草萊  
老夫不足學聖賢有前作譬如着棋着到國手時國手  
頭上猶更儘有着

正月五日以送伴偕官侍宴集英殿十口號

殿下鞭聲再掣雷玉皇徐下九天來陰晴不定朝來定  
五色祥雲霍地開

一點班行朝漢天英符來自玉門關舊時千歲琵琶語  
新學三聲萬歲山

金鬣狻猊立玉臺雙瞻御坐首都回水沉山麝射薔薇露  
漱作香雲噴出來

千官拜舞仰虛皇奉上瑤池萬壽觴殿上雙傳送御酒

檻前一曲繞虹梁

太極香開萬物新  
紹熙天子燕羣臣  
梨園好語君須聽

玉歷初頒第一春

詞臣倪玉甫撰致語口號云玉歷新頒第一春

已賜儀鸞錦坐蒲  
起來再立聽傳臚  
君王欲勸羣臣酒  
宣示天杯一滴無

猛士緣竿亦壯哉  
踏空舞濶四徘徊  
一聲白雨催花鼓  
十二竿頭揔下來

賜花新剪茜香羅  
綈褊烏紗未覺多  
花重紗輕人更老

臺頭不起奈春何

廣場妙戲鬪程材纔得天顏一笑開  
角觝罷時還罷宴  
卷班出殿戴花回

賀老如何尾從班真官也作假官  
看君王恩重無真假  
賜酒何曾味兩般

泊舟臨平

前窓向市下却簾後窓臨水開  
却門岸頭楊柳報春動  
溪底雲天隨浪翻  
隔溪數間黃草屋繞屋千竿翠瓊竹

三老鳴鉦檣樓今宵又向臨平宿

謝王恭父贈梁杲墨

君不見蜀人文字天下工前有相如後揚雄君不見蜀  
人烏丸天下妙前有蒲韶後梁杲初得梁墨竊摹糊老  
夫道梁不及蒲蓬山藏室王校書笑我未識真玄菟雨  
圭水蒼筤雙團點漆壁一併贈老夫此意已金石洮州  
綠玉試松花星潭黑雲走風沙龍蛇起陸鷹入骨却愁  
雷電奪神物

過臨平蓮蕩

蓮蕩層層鏡樣方  
春來嫩玉斬新黃  
角頭一一張蘆箔  
不遣魚蝦過別塘

蓮蕩中央芳露沙  
上頭更著野人家  
籬邊隨處插垂柳  
簷下小船縈釣車

朝來採藕夕來魚  
水種菱荷岸種蘆  
寒浪落時分作蕩  
新流漲後合成湖

人家星散水中央  
十里芹羹菰飯香  
想得薰風端午後

荷花世界柳絲鄉

麥

無邊綠錦織雲機全幅青羅作地衣此是農家真富貴  
雪花銷盡麥苗肥

春菜

雪白蘆菔非蘆菔喫來自是辣底玉花葉蔓青非蔓青  
喫來自是甜底冰三館宰夫傳食籍野人蔬譜渠不識  
用醢不用酸用鹽不用醎鹽醢之外別有味薑芽棖子

仍相叅不甑亦不釜非蒸亦非煮壞盡蔬中腴乃以烟  
火故霜根雪葉細縷來甕瓶夕幕明朝開貴人我知不  
官樣肉食我知無骨相祇合南溪嚼菜根一尊徑醉溪  
中雲此詩莫讀恐噉殺要讀此詩先提舌

提一作提

### 過平望

望中不着一山遮四顧平田接水涯柳樹行中分港汊  
竹林多處聚人家風將春色歸沙草天放晴光入浪花  
午睡起來情緒惡急呼蟹眼瀾龍芽

月夜阻風泊舟太湖石塘南頭

動地顛風政打頭吳江未到且維舟五湖波起衆山動  
一片月明千里愁且更放遲些子睡看他盛怒幾時休  
陽侯要與詩人敵未必詩人輸一籌

過湖未得匹如閒何幸湖心泊畫船宇宙中間都是月  
波濤外面更無天誰知造物將奇觀不與僖人付謫仙  
管領渠儂無一物鏤冰剪雪作新篇

新年乘興看春風來過垂虹東復東誰有功夫寒夜底

獨尋水月五湖中  
今宵頓覺乾坤大  
下筆惟愁造化窮  
太白青山謝公海  
可憐一笑偶然同

姑蘇館上元前一夕陪使客觀燈之集

節物催人又一年  
銀花蓮炬照金尊  
麝鎚官樣陪公讌  
粉繭鄉風憶故園  
何似兒孫談草草  
不妨燈火半昏昏  
人生行止誰能料  
今夕蘇州看上元

廬陵之俗元夕粉米為繭中藏吉語

剥之以占一歲事

至洪澤

今宵合過山陽驛泊船問來是洪澤都梁到此只一程  
却費一宵兼兩日政緣夜來到瀆頭打頭風起浪不休  
舟人相賀已入港不怕淮河更風浪老夫搖手且低聲  
驚心猶恐淮神聽平聲急呼津吏催開閘津吏叉手不敢  
答早潮已落水入淮晚潮未來聞不開細問晚潮何時  
來更待玉蟲綴金釵

過磨盤得風掛帆

兩岸黃旗小隊兵新晴歸路馬蹄輕數番長笛橫腰鼓

一曲春風出塞聲  
鵲噪鴉啼俱喜色  
船輕風順更兼程  
却思兩日淮河浪  
心悸魂驚尚未平

過楚州新野城

已近山陽望漸寬  
湖光百里見千村  
人家四面皆臨水  
柳樹雙垂便是門  
全勝向來元孔道  
雜耕今是一雄藩  
金湯再葺真長策  
此外猶須子細論

過寶應縣新開湖

漁家可是壓塵囂  
結屋圓沙最盡梢  
外面更栽楊柳樹

上頭無數鷺鷥巢

雨裏樓船即釣磯  
碧雲便是綠蓑衣  
滄波萬頃平如鏡  
一隻鷗鷺貼水飛

天上雲烟壓水來  
湖中波浪打雲回  
中間不是平林樹  
水色天容拆不開

五湖佳處是荒寒  
却為無山水更寬  
歸去江南無此景  
未須吃飯且來看

過九里亭

水渚纔容足漁家便架椽屋根些子地簾外不勝天岸  
岸皆垂柳門門一釣船五湖好風月乞去聲與不論錢

再賦石翁石婆

石翁誰怒猶睥目石婆多愁鬢先禿荒山野水四無人  
二老對立今幾春珠襦玉匣化為土金雁銀鳬亦飛去  
知是六朝何帝陵摩娑碧蘚俱無語

觀張功父南湖海棠杖藜走筆

看盡都城種海棠只將一徑引教長約齋妙出春風手

人在中央花四傍

天工信手洒明霞若遣停勻未必佳却得數株多葉底  
殷勤襯出密邊花

走筆謝張功父送似醪醕

西湖野僧夸藏冰半年化作真水精南湖詩人笑渠拙  
不如儂家解藏雪藏冰窖子山之幽鑱透九地山鬼愁  
儂家藏雪有妙手分明曬在翡翠樓向來吳二拉滕六  
玉妃夜投玉川屋剪冰作花吹朔風揉雲為粉散寒空

醉揮兩袖拂銀漢梢頭萬斛冷不融瓊田挈月拾翠羽  
砌成重樓天半許盤作青蛟吐綠霧亂飄六出薰沉炷  
人間雪脆那可藏天上雪落何曾香三月盡頭四月首  
南湖香雪今誰有分似誠齋老詩叟碎挹玉花泛春酒  
一飲一石更五斗

記丘宗卿語紹興府學前景

鏡湖泮宮轉街曲纔隔清溪便無俗竹橋斜度透竹門  
墻根一竿半竿竹恰思是間宜看梅忽然一枝橫出來

霜幹皴裂臂來大只著寒花三兩箇

贈寫真水鑑處士王溫叔

我不如森森千丈松我不如濯濯春月柳髯疎鬢秃已  
雪霜皮皴肉皴真老醜葉生畫時顏尚朱王生畫時骨  
更臞一生愛山吟不就兩肩化作秋山瘦君不見褒公  
鄂公圖凌烟腰間羽箭大如椽君不見浣花醉圖粉墨  
落日斜泥滑驢失脚貴人寒士兩相嗤畫圖猶在人已  
非王生王生且停手不如生前一杯酒

銜命郊勞使客船過崇德縣

岸樹低欹一雪餘  
枝頭半葉已全無  
油窻過盡千梢影  
濃處還濃枯處枯

望多稼亭

遙望城頭多稼亭  
亭邊霜檜老更青  
當年老守攜穉子  
芒鞋葵扇繞城行  
臘前移梅春插柳  
蹋雪衝泥不停手  
柳未成陰梅未花  
著帽又迎新太守  
後來新守復迎新  
到今新舊知幾人  
向來手植今在否  
寄與此詩聊問春

舟中追和張功父賀赴召之句

兩歲千愁寡一欣故人多問謝張君又瞻東闕闕前月  
只負南溪溪上雲賓日扶桑遭聖旦客星釣瀨愧天文  
人生離合風前葉聚首亡何復離羣

余所居里  
名南溪

又追和功父病起寄謝之韻

霜何曾傍繡簾寒酒不能令客臉丹勤向竹爐溫手脚  
嬾尋銅鏡整衣冠無人孤坐月將落擁鼻清吟夜向闌  
忽憶約齋詩債在自吹燈火起來看

曉過丹陽縣

風從船裏出船前漲起簾幃紫拂天點檢風來無處覓  
破窗一隙小於錢

雞犬漁翁共一船生涯都在蒻篷間小兒不耐初長日  
自織筠籃勝打閒

過張王廟

地迴人煙寂山盤水勢回怪松欹岸出古廟背河開晚  
色催征棹斜陽戀去桅丹徒誰道遠一眺正悠哉

湖天暮景

湖面黏天不見堤  
湖心茭葑水周圍  
暮鴻成陣鴉成隊  
已落還飛久未棲

坐看西日落湖濱  
不是山銜不是雲  
寸寸低來忽全沒  
分明入水只無痕

抵暮漁郎初上船  
一竿搖入水精天  
忍寒不睡綠底事  
來早賣魚充酒錢

瑣碎肝脾只坐詩  
鬚髯成雪髻成絲  
暮雲薄倖斜陽劣

合造清愁付阿誰

斷腸浪說賀方回未抵秦郎剪水才欲向湖邊問遺唱  
鴛鴦鸚鵡兩相催

舟中不寐

醉去昏然卧綠窻醒來一枕好淒涼意中為許無佳況  
夢裏分明到故鄉淮水打船千浪雪燕鴻叫月滿天霜  
山城更點元無準偏到雞鳴分外長

過淮陰縣題韓信廟

鴻溝祗道萬夫雄，雲夢何銷武士功。  
九死不分天下鼎，一生還負室前鍾。  
古來犬斃愁無蓋，此後禽空悔作弓。  
兵火荒餘非舊廟，三間破屋兩株松。

雪曉舟中生火

烏銀見火生綠霧，便當水沉一濃炷。  
却因斷續更氤氲，散作霏微煖袍袴。  
須臾霧霽吐紅光，煙如雲表生扶桑。  
陽春和日曛滿室，蒼顏渥丹疑醉鄉。  
忽然火冷霧亦滅，只見紅爐堆白雪。  
窗外雪深三尺強，窗裏雪深一寸香。

烏銀玉質金石聲見火忽學爆竹鳴  
膈膈膊膊久不停  
白日坐上飛繁星不知何怒泄不平  
不知何喜唧唧吟  
待渠自靜勿與爭切莫借箸怒復生  
到渠緘口兩耳熱  
銅瓶在旁却饒舌

題金山妙高臺

金山未到時羨渠奄有萬里之長江  
金山既到了長江  
不見只見千步廊老夫平生不奈事  
點檢風光難可意  
老僧覺我見睨眉引入妙高臺上嬉  
不知老僧有妙手

卷舒江山在懷袖挂上西牕方丈間長江浮在爐煙端  
長江南邊千萬山一時飛入兩眼看最愛簷前絕竒處  
江心巉然景純墓僧言道許乃浪傳龍宮特書珠貝編  
初云謝靈運愛山如愛命掇取天台雁蕩怪石頭疊作  
假山立中流又云王逸少草聖入神妙天賜瑠璃筆格  
玉硯屏仍將大江作陶泓老夫聞二說沉吟未能決長  
年抵死催上船徘徊欲去空茫然

桑疇

夾岸瀕河種穉桑春風吹出萬條長船行老眼渾多忘  
喚作西湖插拒霜

竹林

珍重人家愛竹林織籬辛苦護寒青那知竹性元薄相  
須要穿來籬外生

賦金盤露椒花雨

吾家酒名數腴者曰金盤露芳烈者曰椒花雨

金盤夜貯雲表露椒花曉滴山間雨一涓不用鴨綠波

雙清釀出鵝黃乳老妻知我憎官壺還家小槽壓真珠  
江西擔取來西湖遣我醉倒不要扶更攜數尊往淮上  
要夸親舊嘗家釀祇堪獨酌不堪分老夫猶要入修門  
岸柳

柳梢拂入溪雲陰柳根插入溪水深祇今立岸一敝帚  
歸時弄日千黃金人生榮謝亦如此謝何足怨榮何喜  
秋霜春雨自四時老夫問柳柳不知

松江曉晴

昨夜何緣不峭寒，今晨端要放晴天。  
窗間波日如樓上，簾外霜風似臘前。  
近水人家隨處好，上春物色不勝妍。  
歸時二月三吳路，桃杏香中慢過船。

泊平江百花洲

吳中好處是蘇州，却為王程得勝遊。  
半世三江五湖棹，十年四泊百花洲。  
岸傍楊柳都相識，眼底雲山苦見留。  
莫怨孤舟無定處，此身自是一孤舟。

過新開湖

漁郎艇子入重湖  
老眼殷勤看著渠  
看去看來成怪事  
化為獨雁立橫蘆

一鷗得得隔湖來  
瞥見魚兒眼頓開  
只為水深難立脚  
翩然飛去却飛回

遠遠人煙點樹梢  
船門一望一魂消  
幾行埜鴨數聲雁  
來為湖天破寂寥

瓦店雨作

斜風吹雨打船窗  
一陣疎來一陣忙  
聽作山齋聲點滴

不知作客在山陽

詩人長怨沒詩材  
天遣斜風細雨來  
領了詩材還又怨  
問天風雨幾時開

過淮陰縣

索莫淮陰縣人家  
草草中荻籬緯春  
勝茅屋學船蓬  
今日非昨日南風  
轉北風霍然香霧  
散放出一輪紅

題沈子壽旁觀錄

逢著詩人沈竹齋  
丁寧有口不須開  
被渠譜入旁觀錄

四馬如何挽得回

送吳敏叔待制侍郎

脚踏雞翹豹尾間  
心飛碧岫白雲端  
人看疏傅如圖畫  
帝念嚴光返釣灘  
玉殿松班唐次對  
竹宮茅立漢祠官  
自憐病鶴樊籠底  
方羨冥鴻片影寒

宋詩鈔卷七十七

欽定四庫全書薈要卷二萬三百三十一

集部

宋詩鈔卷七十八

內閣中書舍人吳之振編

楊萬里江東集鈔

題張以道上舍寒綠軒

菊芽伏土糝青粟杞笋傍根埋紫玉雷聲一夜雨一朝  
森然迸出如蕨苗先生饑腸詩作梗小摘珍芳汲水井  
風爐解眼候松聲眾羅親撈微帶生爛炊凋胡浙青精

笔以天隨寒綠萌饑時作鑿仍作羹飽後龍鳳空烹烹  
大官蒸羔壓花片宰夫脰蹠削瓊軟豹胎熬出禍胎來  
貴人有眼何曾見天隨尚自有愁魔愁杞作棘菊作莎  
君不見黃金錢照紅玉豆秋高更覺風味多先生釀金  
鍊紅玉自莎自棘如子何金空玉盡苗復出喫苗喫花  
并喫實天隨白眼屠沽兒不道有人頭上立

望姑蘇

曠野平中天四垂凍雲隙裏日平西水村人遠看來近

茅屋簷長反作低最愛河堤能底巧截它山脚不勝齊  
喜聞借得姑蘇館百尺高臺入杖藜

辛亥元日送張德茂自建康移帥江陵

西湖一別忽三年白首相從豈偶然到得我來恰君去  
正當臘後與春前醉餘犯雪追征帽送了凭欄望去船  
待把衣冠挂神武看渠勲業上凌煙

金陵官舍後圃散策

江梅未落杏花繁萱草都齊柳半勻却是淺寒花較耐

東風未要十分溫

三月三日上忠襄墳因之行散得絕句

長干橋外即烏衣  
今著屠沽賣菜兒  
晉殿吳宮猶碧草  
王亭謝館儘黃鸝

遊人不是上墳回  
便是清湍禊事來  
最苦相逢無處避  
天禧寺及雨花臺

女唱兒歌去踏青  
阿婆笑語伴渠行  
只虧郎罷優輕殺  
搗子雙擔挈酒瓶

粉捏孩兒活逼真象生果子更時新輸贏一擲渾閒事  
空手入城羞殺人

除却鍾山與石城六朝遺跡問難真里名只道新名好  
不道新名悞後人

切記尋春預作謀教君行樂定成愁老夫乘興翩然出  
不遣風知雨覺休

海棠二首

小園不到負今晨晚喚嬌紅伴老身落日爭明那肯暮

艷妝一出更無春樹間露坐看搖影酒底花光併入脣  
銀燭不燒渠不睡梢頭恰恰挂水輪

競豔爭嬌最是它教人嫌少不嫌多初酣曉日紅千滴  
晚笑東風淡一渦自是花中無國色非關格外占春窠  
開時慳與渠懷醉却恨飄零可若何

紅錦帶花

天女風梭織露機碧絲地上茜藥枝何曾繫住春歸脚  
只解縈長客恨眉節節生花花點點茸茸晒日日遲遲

後園初夏無題目小樹微芳也得詩

送劉覺之歸蜀

余少時師事清純先生雋都知縣朝奉劉世臣世臣  
令其子三人從余學其季則覺之也覺之流落大寧  
監後二十九年復相見於金陵為留十日而別贈之  
長句

大江東西湖南北鵠袍學子森如竹何人開口不伊川  
阿誰初導此水源清純先生劉夫子冷笑俗儒鑽故紙

夢中親見大小程為渠刺船入洙泗嗟我結髮從先生  
日日看子趨鯉庭先生命子却從我小窓短檠共燈火  
陋巷柴扉共寒餓安知頭上天幾大子今行李寄大寧  
翩然束書遊帝城袖中一卷經濟策天闕九虎叫不應  
朝來忽見毛生刺看來看去更且喜風花聚散三十年  
何許飛墮老眼前相逢幾日又相別珍重兩字不忍說  
我有故山江之西應遣思歸不遣歸贈行聊借退之詩  
石頭城下一杯酒便是此生長別離

遊定林寺即荆公讀書處

鍾山已在萬山深更過鍾山入定林穿盡松杉行盡石  
一菴猶隔白雲岑

一箇青童一蹇驢九年來往定林居經綸枉被周公誤  
相罷歸來始讀書

半破僧菴半補籬舊題無復壁間詩祇餘手植雙桐在  
此外仍兼洗硯池

踏月敲門訪病夫問來還是雪堂蘇不知把燭高談許

曾舉烏臺詩帳無

初夏即事

今日風光定自佳，不寒不熱恰清和。  
百年人世行樂耳，一歲春歸奈老何。  
芍藥晚花終是小，戎葵新荅許來多。  
俸錢自笑渾無用，祇合文江買釣蓑。

謝余處恭送七夕酒果蜜食化生兒

踉蹌兒孫忽滿庭，折荷騎竹臂春鶯。  
巧樓後夜迎牛女，留鑰今朝送化生。  
節物催人教老去，壺觴拜賜喜先傾。

醉眠管得銀河鵲天上歸來打六更

子庚戌考試殿廬夜漏殺五更之後

復打一更問之雞人云宮漏有六更

新釀秦淮鴨綠坳旋熬粬妝蜜蜂巢來禽濃抹日半臉  
冰藕初凝雪一梢豈有天孫千度嫁枉同河鼓兩相嘲  
渠儂有巧真堪乞不倩蛛絲罥果有

中元前賀余處恭尚書禱雨沛然霑足

數點飄聲供晚晴二更傾瀉到天明雷驅雲氣如旋磨  
雨徧山村却入城簞面頓無秋後暑簷牙最愛夢中聲

尚書幸有為霖手偏灑江東作麼生

中元日午

雨餘赤日尚如炊亭午青陰不肯移蜂出無花絕糧道  
蟻行有水過歸師今朝道是中元節天氣過於初伏時  
小圃追涼還得熱焚香清坐讀唐詩

道傍槿籬

夾路疎籬錦作堆朝開暮落復朝開抽心拒救輕拖糝  
近蒂燕脂蘸抹腮占破半年猶道少何曾一日不芳來

花中却是渠長命換舊添新底用催

方虛日斜再行宿烏山

多稼村村過垂楊店店迎偶然逢客子問得好山名投  
宿忻猶早斜陽落更明僕人休進扇得似晚風清

圩丁詞十解

江東水鄉隄河兩岸而田其中謂之圩農家云圩者  
圍也內以圍田外以圍水蓋河高而田反在水下沿  
隄通斗門每門疏港以溉田故有豐年而無水患余

自溧水縣南一舍所登蒲塘河小舟至鎮水行十二里備見水之曲折上自池陽下至當塗圩河皆通大江而蒲塘河之下十里所有湖曰石臼廣八十里河入湖湖入江鄉有圩長歲晏水落則集圩丁日具土石棣枝以修圩余因作詞以擬劉夢得竹枝柳枝之聲以授圩丁之修圩者歌之以相其勞云

圩田元是一平湖憑仗兒郎築作圩萬雉長城倩誰守  
兩隄楊柳當防夫

何代何人作此圩石頑土膩鐵難如年年二月桃花水  
如律流歸石臼湖

上通建德下當塗千里江湖繚一圩本是陽侯水精國  
天公勅賜上農夫

南望雙峰抹綠明一峰起立一峰橫不知圩裏田多少  
直到峰根不見塍

兩岸沿隄有水門萬波隨吐復隨吞君看紅蓼花邊脚  
補去修來無水痕

年年圩長集圩丁不要招呼自要行萬杵一鳴千畝土  
大呼高唱總齊聲

兒郎辛苦莫呼天一歲修圩一歲眠六七月頭無滴雨  
試登高處望圩田

岸頭石板紮縱橫不是修圩是築城傳語赫連莫蒸土  
霸圖未必賽春耕

河水還高港水低千支萬派曲穿畦斗門一閉君休笑  
要看水從人指揮

圩上人牽水上航從頭點檢萬農桑即非使者秋行部  
乃是圩翁曉按莊

宿孔鎮觀雨中蛛絲

雨打蛛絲不打蛛雨來蛛入畫簷隅網羅滿腹輸渠巧  
也只蠅蚊命屬渠

雨罷蜘蛛却出簷網絲少減再新添莫言辛苦無功業  
便有飛蟲密處粘

網羅最巧是蛛絲却被秋蚊聖得知粘着便飛來不再

蛛絲也解有疎時

發孔鎮晨炊漆橋道中紀行

斫地燒畬旋旋開豆花麻莢更稔栽荒山半寸無遺土  
田父何曾一飽來

行穿詰曲更崔嵬野店柴門半未開  
早莢樹陰黃草屋  
隔籬犬吠出頭來

山村

一搭山村一搭奇不堪風物索新詩  
稻花雪白糝柳絮

柘子猩紅團荔枝行者自愁居者樂晴時即熱雨時泥  
問知桐汭多程在未說宣城與貴池

歇處何妨更歇些宿頭未到日頭斜風烟綠水青山國  
籬落紫茄黃豆家雨足一年生事了我行三日去程賒  
老夫不是如今錯初識陶泓計已差

入建平界

溧水南頭接建平丫頭兒子便勤耕疎麻大豆已前輩  
蕎麥晚菰初後生席卷千山為一園天憐春種賜秋成

不如老圃今真箇樊子何曾透聖局

早炊董家店

長亭深處小亭奇雜蘓粗蕤亦有姿羊角豆纏松葉架  
雞冠花隔竹槍籬不辭雨卧風餐裏可惜橙黃橘綠時  
行到前頭楊柳逕平分紅白兩蓮池

過謝家灣

行盡牛蹊兔徑中忽逢平野四連空意隨白鷺一雙去  
眼過青山千萬重近嶺已看看遠嶺連峰不愛愛孤峰

一丘一壑知何意疎盡官人著牧童

轎中看山

買山安得錢有錢價不賤住山如冠玉人見我不見世  
言遊山好一峰足雙繭峰外復有峰歷盡那能徧不如  
近看山近看不如遠請山略退步容我與對面我行山  
忻隨我住山樂伴有酒喚山飲有款分山饌隔水絕荒  
寒縈雲偏倩絢雨滋青彌深日炫紫還淺端居忽飛動  
遐逝即回轉孤秀呈復逃層尖隱還顯掇入轎中來置

在几上玩劣行三兩驛已閱百千變非我去旁搜皆渠  
來自獻寄言有山人勿賣亦勿典金多汝安用價重山  
亦怨估若為我低傷廉又非願山已在胸中豈復有餘  
羨羨心固無餘更借山一看

早炊高店

過雨溪山十倍明乍晴風日一番清白鷗池沼菰蒲影  
紅棗村虛雞犬聲食肉坐曹良媿死囊衣行步亦勞生  
不堪有七今成九愴父年來老更愴

午熱憩中義渡

秋陽噴我緊追程急泊臨流一短亭  
摘索風巾些子倦  
蒼茫水枕霎時醒  
單牌雙堠頭都白  
萬壑千巖眼強青  
不及溪邊老亭父  
一生卧護竹窓櫺

道傍店

路傍野店兩三家  
清曉無湯況有茶  
道是渠儂不好事  
青甌瓶插紫薇花

花果

野花山果絕芳馨  
借問行人不識名  
蜂蝶行糧猿鶴飯  
一生口分兩無爭

宿池州齊山寺即杜牧之九日登高處

我來秋浦正逢秋  
夢裏重來似舊遊  
風月不供詩酒債  
江山長管古今愁  
謫仙狂飲顛吟寺  
小杜倡情冶思樓  
問着州民渾不識  
齊山依舊俯寒流

齊山五洞其一曰妙峰峰下有山谷

池口移舟入江再泊十里頭  
潘家灣阻風不止

北風五日吹江練  
江底吹翻作江面  
大波一跳入天半

粉碎銀山成雪片五日五更無停時長江倒流都上西  
計程一日二千里今踰灩澦到峨眉更吹兩日江必竭  
却將海水來相接老夫早知當陸行錯斜一帆超十程  
如今判却十程住何策更與陽侯爭水到峨眉無去處  
下梢不到忘歸路我到金陵水自東只恐從此無南風

舟中排悶

江流一直還一曲淮山一起還一伏江流不肯放人行  
淮山只管留人宿老夫一出緣秋涼半塗秋熱難禁當

却借樓船順流下逆風五日殊未央老夫平生行此世  
不自為政聽天地只今未肯放歸程安知天意非奇事  
平生愛誦謫仙詩百誦不熟良獨癡舟中一日誦一首  
誦得徧時應得歸

丁家洲避風行小港出荻港大江

蓼岸藤灣隔盡人大江小港繞成輪圍蔬放荻不爭地  
種柳堅堤非買春匏瓠放教俱上屋漁樵相倚自成隣  
夜來更下西風雪蕎麥梢頭萬玉塵

荻籬蕭灑織來新茅屋橫斜畫不真乾土種禾那用水

園中有禾  
元非田畝

濕蘆經火自成新

斫蘆卧地而  
火其枝葉

島居莫笑三

百里菜把活他千萬人

丁家洲濶三百里只  
種蘿蔔賣至金陵

白浪打天

風動地何曾驚着一微塵

江天暮景有歎

一鷺南飛道偶然忽然百百復千千江淮總屬天家管  
不肯營巢向北邊

過宜福橋

水鄉澤國最輸農無旱無乾只有豐碧豆密爭桑蔭底  
綠荷雜出稻花中是田是沼渾難辯何地何村不同  
若遣明年無種子却愁閒殺雨和風

宿峨橋化城寺

一溪秋水一橫橋近路人家却作遙柳遶溪邊荷遶屋  
何須更着酒旗招

忽從平地上高城乃是圩塘隄上行厚賽柳神銷底物  
長腰雲子潤腰菱

宿放牛亭秦太師墳菴

函關只有一穰侯瀛館寧無再帝丘  
天極八重心未死  
台星三點折方休  
只看壁後新亭策  
恐作移中屬國羞  
今日牛羊上丘壠  
不知丞相更嗔不  
暮年起大獄必殺張德遠胡邦衡等  
五十餘人不知諸公殺盡將欲何為奏垂上而卒故有新亭之句然初節似蘇子卿而晚謬

新酒歌

官酒可憎老夫出家釀二缸  
一日桂子香一日清無底  
風味凜冽歌以紀之

酸酒釐湯猶可嘗甜酒蜜汁不可當老夫出奇釀二缸  
生民以來無杜康桂子香清無底此米不是雲安米此  
水祇是建鄴水甕頭一日遶數巡自候酒熟不倩人松  
槽葛囊纔上榨老夫脫帽先嘗新初愁酒帶官酒味一  
杯徑到天地外忽然玉山倒甕邊只覺劍鋌割腸裏杜  
撰酒法不是儂此法來自太虛中酒經一卷偶拾得一  
洗萬古甜酒空酒徒若是嘗儂酒先挽天河濯渠手却  
來舉杯一中之換君仙骨君不知

睡覺

小醉如無酒寒宵似度年覺來因記夢醒去不成眠萬  
事從心下三更到眼前清愁政無那一雁叫霜天

至後睡覺

匆匆又過一陽生睡恰濃時夢忽驚簾幕深沈人四寂  
階除點滴雨三更燈搖芒角開成暈風吸窓櫺過後聲  
不是寒雞寒似我如何不肯喚天明

宿金陵鎮樓隱寺望橫山

再見橫山滴眼新山僧勸我脫官身燈籠簫鼓村村社  
酒酸鶯花處處人忽憶諸公牡丹會轉頭五柞去年春  
野雲墟月空荒寺兩袖寒風一帽塵

明發棲隱寺

木魚一呼衆僧聚老夫登車欲前去仰頭見天俯見地  
明明是晝不是暮如何今晨天地間咄咄怪事滿眼前  
將為是夜着月輪已沒星都落將為是晝休銀河到曉  
爛不收皎如江練橫天流中流點綴金沙洲元來海底

早浴日雲師閉闕不教出義和揮斧斫雲闕取將一道  
天光還天光淡青日光白道是雲漢也則得雲師強狠  
趕不奔堆作沙洲是碎雲

寒食日晨炊姜家林初晨之次日也

百五佳晨匹似無合教追節却離居萬家寒食初歸燕  
一老春衫政蹇驢耄柳已僧何再髮孺槐纔爪可遲梳  
兒書早問歸程日不用嗔渠只笑渠

午憩褚家坊春風亭

此老忒疎放與春無怨思何須寒食日恰是別家時荒  
店兩三隻野花千萬枝前山有底恨也學客顰眉  
莫道迎春好迎春是送春可憐一條路知老幾多人坦  
綠偏宜襪飄紅并作網青帘好消息今日榨頭新

宿新市徐公店

春光都在柳梢頭揀折長條插酒樓便作在家寒食看  
村歌社舞更風流

風花

海棠桃李雨中空更看清明兩日風風似病顛無籍在  
花如中酒不惺鬆身行楚嶠遠更遠家寄秦淮東復東  
道是殘紅何足惜後來并恐沒殘紅

過楊二渡

春迹無痕可得尋不將詩眼看春心鶯邊楊柳鷗邊草  
一日青來一日深

宿黃岡

我豈忘懷一畝居誰令愛讀數行書秋南春北雁相似

柳思花情鶯不如  
上市魚蝦村店酒  
帶花菰芥晚春蔬  
長亭一醉非難事  
造物相撩莫管渠

清明日午憩黃池鎮

莫笑孤村小市頭  
花邊人出浦邊遊  
綠楊拂水雙浮鴨  
碧草粘天一落鷗  
嬾困風光酣午睡  
陰沈天氣嫁春愁  
阿誰道是清明節  
我對清明喚作秋

桑茶坑道中

田塍莫道細于椽  
便是桑園與菜園  
嶺腳置錐留結屋

盡驅柿栗上山巔

上山入屋上山鉏  
圖得生涯總近居  
桑眼未開先着椹  
麥胎纔出便生鬚

秋疇夾岸隔深溪  
東水何緣得到西  
溪面祇銷橫一覓  
水從空裏過如飛

蠶麤今歲十分強  
催得農家日夜忙  
已縛桁竿等新麥  
更將了木撐欹桑

清明風日雨乾時  
草滿花隄水滿溪  
童子柳陰眠正着

一牛喫過柳陰西

山根一徑抱溪斜  
片地纔寬便數家  
漫插漫成隄上柳  
半開半落路傍花

明發周村灣

不住寬鄉住甕門  
那知世上有乾坤  
環將峻嶺包深谷  
圍出餘天與別村  
茅屋相挨無着處  
花溪百摺不教奔  
江淮地迫寒無價  
宣歙山寒更莫論

過湖駱坑

已被山寒病老身  
車徒溪涉更艱勤  
霧皆成點無非雨  
日出多時未脫雲  
猿鳥一聲人不見  
松杉四塞徑無痕  
十分晴暖儂何福  
肯借曦光三五分

安樂廟頭

誰遣詩家酷愛山  
愛山說得口瀾翻  
千峰萬嶺爭投奔  
一陟三休却倦煩  
堆案滿前何處着  
枯腸飽後豈能餐  
殘嵐賸翠渾無用  
包寄金陵同社看

宣歙道中

天齊玉立萬孱顏三日深行紫翠間便是昨來千佛閣  
望中見此兩州山詩家寒刮少陵骨宮樣高梳西子鬟  
祇好遙看莫登覽今晨登處髻都斑

新安登江水自績溪發源

金陵江水只醎腥敢望新安江水清皺底玻璃還解動  
瑩然鄴渌却消醒泉從山骨無泥氣玉漱花汀作珮聲  
水記茶經都未識謫仙句裏萬年名

太白云借問新安江見底何如此又

云何謝新安水  
千尋見底清

明發黃土龕過高路

又過崢嶸兩峽間也無溪水也無田嶺雲放腳寒垂地  
山麥掀髯翠拂天碧玉屏風吹不倒青綾步障買無錢  
詩人富貴非人世猶自淒涼意惘然

晨炊泉水塘村店無肉只買筍蕨嘲亭父

屠門深閉底須愁土銼無烟也莫羞筍便落林猶勝肉  
蕨纔出土更饒油萬錢下箸今安在一飯流匙飽即休

吾道藜羹元不糝至今諱殺古陳州

陳州人諱餓殺孔夫子

明發西館晨炊謁岡

人家爭住水東西即是臨溪却背溪  
搜得一家無去處跨溪結屋更精奇

何須名苑看春風一路山花不負儂  
日日錦江呈錦樣清溪倒照映山紅

閬門外登溪船

步下新船試水初打頭攬載適逢予  
一椽板屋纔經雨兩面油窓好讀書  
剝買春園紅芍藥亂簪渠渠几竹簾

清溪浮取松亭子賞徧千山不要驢

上得船來恰對山一山頃刻變多般初堆翠被百千摺  
忽拔青瑤三兩竿夾岸兒童天上立數村樓閣電中看  
平生快意何曾夢老向閭門下急灘

當面峰頭些子雲坐看吹作雨紛紛朝來山路能愁我  
今者溪船正要君遠嶺輕盈橫皺殺明窓撩亂觸驚蚊  
猶爭新漲一篙碧遮莫飄蕭二十分

選甚天時晴未晴舟行終是勝山行逢欣雨點斜偏好

枕慣波聲夢不驚幸自車從小休息又聞鼓笛開將迎  
偶然回首來時路一夜霜毛一倍生

無家不住曲溪邊祇種高山不種田絕壁入天天入水  
亂篙鳴石石鳴船百灘春浪雲頭過兩岸林花鏡底眠  
歸路商量更舟楫廬山彭蠡好風烟

芙蓉渡酒店前金沙芍藥盛開

山店春光也自妍芙蓉渡口數家邨筍輿低過金沙架  
籬落疎園芍藥軒孤客倦遊殊寂寞雨花作意與溫存

可憐經眼匆匆去不折紅香到綠尊

晨炊橫塘橋酒家小窓

饑望炊烟眼欲穿可人最是一清帘雙渠走水穿三店  
獨樹歌流蔭兩簷窓扇透明仍挂上爐香未盡又多添  
山中祇苦無良醞嫌殺芳醪似蜜甜

過松源晨炊漆公店

莫言下嶺便無難賺得行人錯喜歡正入萬山圈子裏  
一山放出一山攔

答徐子村談絕句

受業初參王半山終須投換晚唐間  
國風此去無多子  
闕榜挑來祇等閒

雨後泊舟小箬回望靈山

靈山相識已平生雨後精神見未曾  
一朵碧蓮三萬丈  
數來花片八千層  
雲姿霧態排天出  
竹杖芒鞋欠我登  
羨殺峰頭看山寺  
厭山不看是諸僧

悶歌行

阻風泊湖心康郎山旁小舟三宿作悶歌行

書策看來已覺煩詩篇壓了更休論客心未便無安頓  
試數油窓雨點痕

風氣掀天浪打頭只須一笑不須愁近看兩日遠三日  
氣力窮時會自休

題漱玉亭示開先長老師序

山根玉泉仰面飛飛出山頂却下馳自從廬阜瀉雙練  
至今銀灣乾兩枝雷聲驚裂龍伯眼雪點濺濕嫦娥衣

寄言蘇二李十二莫愁瀑布無新詩

發揚港渡入交石夾

朝雨匆匆霽春山歷歷嘉老青交幼綠暗錦出明花漁  
艇十數隻雞聲三五家人生須富貴此輩亦生涯

題東西二梁山

發蕪湖舟過東梁山西梁二石皆石峰夾大江對立兩  
岸即采石蛾眉亭所望見如雙眉者

莫恨當初畫得偏却因偏處反成妍喜來舒展愁來蹙

各樣嬌嬈更可憐

傳道臨春惜麗華不從陳帝入隋家獨將亡國千年恨  
留下雙顰寄岸花

發慈湖過烈山望見歷陽一帶山

夢繞天津月再灣慈湖解纜已開顏淮山到眼長相識  
直北青梢是定山

讀唐人于漬劉駕詩

劉駕及于漬死愛作愁語未必真許愁說得乃爾苦一

字入人目蜚出兩睫雨莫教雨入心一滴一痛楚坐令  
無事人吞刃割肺腑我不識二子偶覽二子句兒曹勸  
莫讀讀着恐愁去我云寧有是誠讀亦未據一篇讀未  
竟永慨聲已屢忽覺二子愁併來遮不住何物與解圍  
伯雅煩盡護

送丘宗卿帥蜀

諭蜀宣威百萬兵不須號令自精明酒揮勅律天西枕  
鼓卧蓬婆雪外城二月海棠傾國色五更杜宇說鄉情

少陵山谷千年恨不遇犀江眼為清

發趙屯得風宿楊林池是日行二百里

動地風來覺地浮拍天浪起帶天流  
舞翻柳樹知何喜拜殺蘆花未肯休  
兩岸萬山如走馬一帆千里送歸舟  
出籠病鶴孤飛後回首金籠始欲愁

平望夜景

三簌簌三當當夜泊平望更點長新月  
無光湖有光昨宵一雪今宵霜犬吠兩岸歸人忙  
夜深人靜無一事畫

燭泣殘人欲睡忽有漁船外水來一棹波聲風雨至半  
生墮在紅塵中浮家東吳東復東樓船夜宿琉璃國誰  
言別有水晶宮

登鳳凰臺

千年百尺鳳凰臺送盡潮回鳳不回白鷺北頭江草合  
烏衣西面杏花開龍蟠虎踞山川在古往今來鼓角哀  
只有謫仙留句處春風掌管拂蛛煤

上巳寒食同日後圃散行

百五重三併一朝風光不怕不嬌嬈  
鹿葱引道心猶卷  
楊柳簷門手對招筇未喚隨非是強扇聊作伴不須搖  
先生道是無歌舞花勸鶯酬酒自銷

代書呈功夫

不見子張子令人夢亦思只應依舊瘦近作幾多詩  
聯句平生事看花去歲時海棠今好不傳語併醖醖

折花

指似青童折海棠繁枝仍要艷花房  
癡眉眼底生疎手

顛脫花房悶一場

陪留守余處恭總領錢思提刑傅景仁游清涼寺

即古石頭城

已守臺城更石城不知併力或分營六師只遣還天闕  
一壘真成借寇兵向者王蘇俱解此冤哉隗協可憐生  
若言虎踞渾堪倚萬歲千秋無戰爭

夏日雜興

金陵六月曉猶寒近北天時較少暄打盡林禽那待熟

半開萱草已先翻，獨龍岡頂青山摺。  
十字河頭別一痕，九郡報來都雨足。  
插秧收麥喜村村。

新亭送客

六朝豈是乏勲賢，為底京師不晏然。  
栢壁置人添一笑，楚囚對泣後千年。  
鍾山喚客長南望，江水流人懶北還。  
強管興亡談不盡，枉教吟殺夕陽蟬。

初秋行圃

今年六月不勝涼，七月炎蒸不可當。  
一陣秋風初過雨，

箇般天氣好燒香

小小園亭亦自佳  
晚雲雨過却成霞  
爛開梔子渾如雪  
已熟來檣尚帶花

花梢飛下兩鳴鳩  
欲住還行行復留  
拾得來禽吞不得  
啄來啄去竟成休

落日無情最有情  
偏催萬樹暮蟬鳴  
聽來咫尺無尋處  
尋到旁邊却不聲

竹牀

已製青奴一壁寒更搯綠玉兩頭安誰言詩老眠雲榻  
不是漁郎釣月竿醉夢那知蕉葉雨小舟親過蓼花灘  
蹶然驚起天將曉牕下書燈耿復殘

後圃秋步

夏簾秋新妒暄窓冷早侵病葵萱未悟落果草偏深老  
矣曾縈望歸歟更嬾心此冠彈與掛若箇不山林

聽蟬絕句

一隻初來報早秋又添一隻說新愁兩蟬對語雙垂柳

知鬪先休鬪後休

渠與斜陽有底讐  
千冤萬恨訴清秋  
更從誰子做頭抵  
只放斜陽不落休

望帝啼春夜更多  
不知蟬意却如何  
還來入夜便無語  
明日將詩理會他

罪過渠儂商略秋  
從朝至暮不曾休  
莫嫌入夜還休去  
自有寒蛩替說愁

八月朔曉起趣辦行

雨後晨先起花間濕也行破除婪尾暑領略打頭清  
蠹果無遲落枯枝忽再榮便須秣吾馬及此半陰晴

蚤起稜鎮

人趣村中樹雞鳴檐上籠忽看一天紫未吐半輪紅誰  
撼扶桑露吹來楊柳風詩肩忍涼冷已出兩臞峰

山路祇言迫農家俱夙興短長羣穉子回避一田塍隨  
犬能知路騎牛底用繩茲行有勝事何處不豐登

發銀樹林

莫過溪橋銀樹林溪深未抵路泥深清風一陣掠人面  
晴色半開闕客心遠嶺惹雲秋裏雪淡天刷墨曉來陰  
幾多好句爭投我柳奪花偷底處尋

曉行望雲山

霽天欲曉未明間滿目奇峰總可觀却有一峰忽然長  
方知不動是真山

四更發青陽縣西五里柯家店

轎中萬兀路千縈死盡村雞無一鳴落月正明知未曉

暗泉甚遠只聞聲自緣客子行來早豈是秋天不肯明  
午熱未來先下店却將晝睡補宵征

過若山坊進退格

綠漲空中幄黃鋪地上雲風條鈎過轎雨穠沒行人夾  
路桑千樹平田稻十分泥行殊不惡物色逐村新

菜圃

此圃何其窄于儂已自華看人澆白菜分水及黃花霜  
熟天殊暖風微旆亦斜笑摩桃竹杖何日拄還家

冬暖

小春活脫是春時  
霜熟風酣日上遲  
晚蝶頻來獵殘葉  
驚禽衝過倒垂枝  
暫閒何似長閒好  
無事非關了事癡  
三徑一筇人不見  
假山以外菊花知

題青山市汪家店

小小樓臨短短牆  
長春半架動紅香  
楊花知得人孤寂  
故故飛來入竹窓

宿新豐坊咏餅中牡丹因懷故園

客子泥塗正可憐，天香國色一枝鮮。  
雨中晚斂寒如此，燭底宵暄笑粲然。  
自覺玉容微婉軟，急將翠掌護嬋娟。  
江南也有新豐市，未羨賓王酌聖賢。

嘲道旁楓松相倚

雙楓一松相後前，可憐老翁依少年。  
少年少年翡翠新衫子，老翁深衣青布被。  
更看秋風清露時，少年再換輕紅衣。  
莫教一夜霜雪落，少年赤立無衣著。  
老翁深衣却不惡，宿白雲山奉聖寺。

徑夾長松地照青眼看高閣與雲平出林殿脊先知寺  
滿地花枝未見鶯上到峰頭千嶂合下臨嶺脚一溪橫  
山寒入骨冰相似冰殺人來却道清

安樂坊牧童

前兒牽牛渡溪水後兒騎牛回問事一兒吹笛笠簪花  
一牛載兒行引子春溪嫩水清無滓春洲細草碧無瑕  
五牛遠去莫管他隔溪便是羣兒家忽然頭上數點雨  
三笠四蓑趕將去

宿黃土龕五更聞子規

通宵不睡睡方奇夢裏驚聞新子規  
只是一聲已腸斷  
況當三月落花時不論客子愁無那  
便遣家人聽亦悲  
歸到江西歸始了江東歸得未為歸

和道父山歌

東家娘子立花邊長哭花枝脆不堅  
却被花枝哭娘子  
嫁期已是蹉春前

阿婆辛苦住西鄰豈愛無家更願貧  
秋月春風擔閣了

白頭始嫁不羞人

附王道父原作

夜卧舟中聞有唱山歌者倚其聲作二首

生來不識大門邊一片丹心石樣堅  
間得阿郎誰得婦無媒爭得到郎前

種田不收一年事取婦不著一生貧  
風吹白日漫山去老却郎時懊殺人

明發四望山過都昌縣入彭蠡湖

衆船爭取疾直赴兩山口吾船獨橫趨甘在衆船後問  
來風不正法當走山右不辭用盡力要與風相就忽然  
挂孤帆吾船却先走

### 大姑山


小姑小年嫁彭郎大姑不嫁空自孀小姑有夫似織女  
大姑無夫如姮娥戶慈湖也曾說媒妁執柯教與五老約  
東方一老差妙齡正似彭郎却老成大姑背面啼更道  
豈有老人會年少大姑年來年去今亦老

道中紀行

可堪衰病兩相纏更苦懸車尚五年  
羨殺雨中山上水  
留他不住竟歸田

君看人跡蝶來輕踏得林間路作坑  
古路今人行不得  
一時移上上頭行

宋詩鈔卷七十八



總校官庶吉士臣張能照  
校對官檢討臣王鍾健  
謄錄貢生臣蘇曰柄  
謄錄監生臣王心仁